



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim tir yimiyim TAPAK 3

BJP-i kum 7 tsungda rongsenkettsung  
jenjang raksatsü: Sachin Pilot

Taoba Mizoram BJP otongdar  
Lalhriatrenga Congress nung denogo

VOL. XIX NO. 13 (ADOK 13) DIMAPUR YANGTEPNÜ (THURSDAY) MONGPUTENI (OCTOBER) 21, 2021 ₹ 5.00

## Nüburtemi Power Dept. den amalitepalitsü mepishir

**Dimapur, Mongputeni/Oct. 20 (TYO):** Mokokchung nung power tensa indang jembishinütsü atema October 20, 2021 nü Electrical Division Mokokchung aser All Ward Union Mokokchung Town (AWUMT) telungjem senden ka mena liasü, ta Er. Moameren, Executive Engineer, Mokokchung Electrical Division ajanga sangdong ka nung ashi. Mapang meshidak nung load shedding aliba ya India tesem ajungalen mijang (coal) agi anungba ajanga lir. India nung power agütsüba ya shilem 53 shi mijang nungi adokdaksür, ta pai ashi. Nagaland indang Load Center (SLDC) ya Dimapur nung amenoka lir aser power supply

ya load center nungi lemsar agütsür aser yamaji power supply aliba nung ajemdaker load center ajanga load shedding ya benoker, ta sangdong ajanga ashi. Consumer dang power tajemba atsüksü mepishir. Maneni load shedding mesüra power agütsüba sülen load intake ya tanem tanemi timba kumdaksütsü ajungshir, kechiaser ajungbena power tali agiba ajanga transformer nung kongshir aser circuits tem raksar aser power supply nung timtem ajurur, ta sangdong nung shia lir. Power tensa tajungba makum tashi nüburtemi timtem aremzüka department den amalitepalitsü ajungshir, ta Er. Moameren ajangasa ashi.

## Ozü zungsem tepsettsü merangba khukhua aitsür: DALT

**Dimapur, Mongputeni/Oct. 20 (TYO):** Khezhakeno yimtsung nungi Kevechulo aser Cheichama yimtsung nungi Keneiletuo Zumvu nati tesungmangtsüka Chumokedima Police Station kübok Khopanala tesem nung ozü kin nungi Aremchang Imchen tepsettsü merangba süngmanga bilemer, ta Dimapur Ao Lanur Telongjem (DALT) sangdong ka ajanga ashi. Tai tonglokja aliba nisung ana yagi tebilemba tamajung nung parnok gari amshia lenmang nokdanga timtem ajurur alisang aser par medemertem gari marakzüteni kumdaksü. Gari nung mena alirtem dang kin jangjatsü asüngdang aser tia maka Aremchang iba timtem ajura liasü, ta sangdong ajanga ashi. Aremchang dak nok-o-nü techira agi tekolak kangasa mejungi yirutsü aser takumret raksatsü, aser temang telung yiruba indang medical report ano mangu lir, ta ashi.

Iba ama mapa tamajung inyaker nisung ana atema tangatetba aliba loktiliba nung tagidak maka aser iba amala yimya yabo ozüng agi melaba ama merenshitsu nungdaker aser tekeratiba nung ochi obendang agütsütsüla, ta DALT sangdong ajanga ashi. Kin balala tsungta telongjem lidaksütsü mechi Naga nung tsungta telemsa adokdaksüba molungsentüsü keter alir iba ama nisung nem Naga nung sobaliba ozüng takang agi merenshitsu, ta ashi. Pei nukjidong atongtsü aoshi kuli kecha makai ozü kin zungsem dak iba ama timtem agütsüba mapang DALT-i ajem-ajema repranga matatsü, ta sangdong ajanga ashi. Aremchang tekeraba nung taneptsü angutsü sarasademtsür aser ozüng amshirtemi tekeratiba nung tim obendang agütsütsü imla atar, ta DALT sangdong ajangasa ashi.

## Guwahati nung petrol pump ghonda 48 shibangtsü ayonger

**Guwahati, Mongputeni/Oct. 20 (TYO):** Guwahati nung Dealers Association ajanga petrol pump tem ghonda 48 shibangtsü sentong ayongzüka lir. Ghonda 48 mokdang ya October 22, 2021 anepdang 6:00 ako nungi tenzüksü aser October 24, 2021 anepdang 6:00 ako nung tembangtsü. Linük tesem ajungalen totzü jenjang kanga sashia temlokba ngua arur. India nung tesüiba anogo ishika tsungta petrol aser diesel jenjang maneni temlokyonga arur. Totzü jenjang nungya excise duty, value-added tax (VAT) aser dealer commission dena lir.

October 16 tashinung petrol litre nung paise 30 nungi 35 tashi temlokba nguogo aser diesel jenjanga litre nung paise 33 nungi 37 tashi temlokogo. Asemnü buba atonga totzü jenjang temlokba sülen Honibarnü Guwahati nung petrol ya litre ka nung sen 101.45 aser diesel ya litre ka nung sen 93.90 meshia liasü. Bodhbarnü Kamrup Metro nung petrol ya litre ka nung sen 102.16 aser diesel litre ka nung sen 94.65 liasü. Kasa anogo Dimapur nung petrol litre ka nung sen 104.59 aser diesel litre ka nung sen 97.07 meshia liasü.

## Terenlok aser employment atema technology nung lenmang lir: MP Kenye

**Kohima, Mongputeni/Oct. 20 (TYO):** Terenlok akatsü, employment adokdaksütsü, senpongi sen aitba tali kumdaksütsü aser taküm jenjang tajungba küma renloksü atema technology nung lenmang sadema lir, ta Nagaland nungi Rajya Sabha zungsem, K G Kenye-i Bodhbarnü ashi. Kenye-i iba olen ya Kohima nungi virtual yimya nung World Forum 4.0 nung jembidang ashi.



K G Kenye

World Forum 4.0 ya linük balala nungi takotet nisungtem, yimten yimsüsür, CEOs, managers, sorkar, company aser lokti tentet balala ajanga kümtetba ka lir aser tashidak wara sülen nisung taküm, rongsenketzung tanaben shia aruba nung tongti shilem agitsü digital platforms aser technology aser United Nations Sustainable Development Goals, SDGs tem ajangtetsü nukjidong nung iba senden ya ayongzüka liasü. Kenye, shiba Parliamentary Standing Committee on Food, Consumer Affairs and Public Distribution and Parliamentary Consultative Committee on Rural Development nung zungsem lir, pai ashiba agi, asenoki kodang Fourth Industrial Revolution indang bilemdir June 29, 2019 nü G-20 Osaka Leaders' Declaration indang bilemer. Iba sangdong nungya sentong tajung yanglua inyakba

lemsateptsü aser digital putu nung meimchir ajangzüksüsa mapa tanung inyaksü shia lir, ta pai ashi. Sentong yanglur aser Government of India indang National Committee on Information Technology nung zungsem ka ama, asen nüburtem nem nungdakba 'goods and services' agütsütetsü atema technology tsütsü terenlok amshitsu nukjidong lir, ta pai ashi. Terenlok lidaksütsü, employment adokdaksütsü, rongsen aitba jenjang ajungmettsü aser nüburtem taküm jenjang tajungba kumdaksütsü atema technology nung lenmang aser nukla lir, ta Kenye-i ashi. Nagaland densema India nung state 16 atema GoI ajanga "high speed broadband Internet" connection agütsütsü agizükogo. Iba yagi Online Education, Telemedicine, Skill Development aser E-

Commerce tem asen yimtsung nungi agitetsü, ta pai ashi. COVID nungi alima tanaben shia arutsü merangba mapang, iba tashidak wara yagi lokti tentet balala aser shishilempaba yimya melenshidaksü, ta pai ashi. Tasa-lentong yanglur ka ama asenoki sorkar, nübur aser private sector nungi Academia aser civil society tashi dendaksüttsüla, ta ashi. Digital divide aser digitalization nung nüburtem yimya sübadaksütsü atema apular ka ama sentongtem yanglua inyaksüla aser mezungbuba nung tang terenlokdak aser ajema renloka aliba linüktem nung temolung agütsütsüla, ta Kenye-i ashi. "Iba yagi Micro, Small aser Medium Enterprises tem ajangzüksüla aser ajangshibatem kati ka den lemsateptsüla," ta pai ashi. Tasa-lentong yanglur aser international community ajanga digital economy nung security temaba jenjangi ajungkettsü aser mawajemba senzuka metoktsütsüla, ta ashi. Fourth Industrial Revolution ajanga meimchir dak rangloker temelenshi animesoba nung loktiliba, linük balala aser tongtipangsa libajen ajungtsü atema inyaksüla. Alima nung khuret balala angatetba senso tajung kaka ama asenoki aginüba temelenshi atema inyaker kaka asütsüla, ta paisa ashi.

## COVID-19 Nagaland: Cases tasen 18 aser taneptsü angur 9 liasü

**Kohima, Mongputeni/Oct. 20 (TYO):** Bodhbarnü state nung COVID-19 cases tasen 18 puteta tang tashinung iba tashidak agi Nagaland nung nisung 31,659 meneper alitsü. "Tanü COVID-19 positive cases 18 putetba ya Dimapur nung 10, Kohima nung pezü, Wokha nung ana, Peren aser Tuensang nung kaka alitsü," ta State Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi. Iba tashidak agi menepa alir nisung tuko- Dimapur nung pungo, Kohima nung ana, Mokokchung aser Tuensang nung kaka - tesüiba ghonda 24 tsungta taneptsü ngua state nung tang tashinung iba tashidak nungi taneptsü angur nisung ajak agi 29,702 alitsü. State nung iba tashidak nungi taneptsü

anguba rate ya shilem 93.81 alitsü, ta pai ashi. Tang state nung COVID-19 active cases 255 lir, aser item rongnung nisung 54 dak iba tashidak agi timtem agütsüba sümia ajiteter, nisung ti tera timtemer, nisung toku kanga sashia kangshir aser nisung 184 dak iba tashidak agi timtem agütsüba mali, ta pai ashi. Bodhbarnü iba tashidak agi state nung nisung asüba meliasü, anungji tang tashinung coronavirus agi asür nisung 676 lir aser item rongnung nisung 15 dak danga tashidak dena liasü. COVID-19 agi menepa alir nisung 1,026 danga state temi ogo, ta pai ashi. Nagaland nung tang tashinung COVID-19 tashidak alitsü südi ta temolung melemi sample 388,526 tendangogo. Item ya RT-PCR nung 110,556, TrueNat nung 84,940 aser

Rapid Antigen Test nung 193,030 tendang, ta Dr Kikon-i ashi. Mongulbarnü tashinung nisung 703,273 nem COVID-19 vaccine doses 11,52,882 agütsüogo, ta State Immunization Officer, Dr Ritu Thurr-i ashi. State nung tang tashinung iba mozü agir alirtem ya frontline nung inyaker nisung 60,957, healthcare nung inyaker 15,998, arishi kum 45 nungi tema nisung 200,972 aser arishi kum 18 nungi 44 tsungta nisung 425,346 alitsü, ta pai ashi. Nisung 449,609 nem vaccine dose tanabuba agüja parnok vaccination course tembangogo. Parnok ya frontline nung inyaker nisung 47,772, healthcare nung inyaker nisung 13,347, arishi kum 45 nungi tema nisung 153,273 aser arishi kum 18 nungi 44 tsungta nisung 235,217 alitsü, ta Dr Thurr-isa ashi.

## NSLSA-i awareness sentong balala ayongzüka agi



Kiphire



Mokokchung

**Dimapur, Mongputeni/October 20 (Agencies):** Azadi Ka Amrit Mahotsav aser Legal Services hopta nung shilem ka ama National Legal Services Authority tawabangba kübok Nagaland State Legal Services Authority-i, Lok Adalat, Legal Services aser departments' balala kübok Welfare Schemes aliba dak sendakba nung hopta ka tepeyong awareness sentong balala ayongzüka agiogo.

Iba sentong ya Right to Education/Food Security Act/Health Schemes aser Social Welfare Scheme onüktem dak rangloker Arogo/NGO aser Stakeholders tem densema Sub-Divisions balala nung October 12 nungi 16 tashi District legal Services Authorities-i ayongzüka agiogo.

Mokokchung DLSA nung Chuchuyimlang town Legal service, Para legal volunteers temi ayongzüka October 16 nü Chuchuyimlang jila nung lanurtem atema health and family welfare schemes, Social welfare schemes, right to education aser Food security Act dak sendakba nung legal awareness sentong ka ayongzüka katsüogo. Iba sentong nung lanur 60-i shilem agia liasü.

Kiphire DLSA-ia, October 16 nü Kiusam jila nung legal awareness sentong ka ayongzüka agiogo. Sentong nung Tsalgi Vice President GBs Union Kiusam Area-i lokti pelaa agizükba o jemi. CJM cum Secretary DLSA Kiphire Phuleto Yeptho-i, Lok Adalat aser Legal Services indang jemi, Retainer Lawyer, DLSA Kiphire Bendangwati Sangtam-i ICPS aser Mid-Day-Meal indang jemi aser APP Kiphire Michael Aye-i Health and Family Welfare

Schemes aser National Food Security Act indang jembia liasü. Iba sentong nung yimtsüing 14 nungi nisung 70-i shilem agi.

Kiphire DLSA-isa, October 12 nü Seyochung jila nung legal Awareness sentong ka ayongzüka katsüogo. Iba sentong nung NCS, ADC, Seyochung Renbo-i lokti pelaa agizükba o jemi aser CJM cum Secretary DLSA Kiphire Phuleto Yeptho-i, Lok Adalat aser Legal Services indang, APP Kiphire Michael Aye-i Health and Family Welfare Schemes aser National Food Security Act indang aser Retainer Lawyer, DLSA Kiphire Bendangwati Sangtam-i ICPS aser Mid-Day-Meal indang jembia liasü. Iba sentong nung ajak senteper nisung 75-i shilem agi.

Maneni October 13 nü Kiphire kübok Sitimi Headquarter nung Legal Aid Clinic tenzüksüba den legal awareness sentong ka ayongzüka agiogo. Sentong nung Nchumthung Ezung, NCS, EAC, Sitimi HQ-i lokti pelaa agizükba o jemi aser ketdangsurtemi Lok Adalat aser Legal Services, Health and Family Welfare Schemes aser National Food Security Act aser ICPS aser Mid-Day-Meal dak sendakba nung tangazükba agüja liasü. Iba sentong nung nisung 70-i shilem agi.

Secretary Kumdilon Kessen-i anir Tuensang District Legal Services Authority team kati RTE, food security act, Legal Services aser department balala kübok welfare schemes tem indang tangazükba agütsüsü atema sub-divisional level nung tesem kar sema senzüogo. DLSA-i Kuthur, Saddle, Yakur, Shangpur, Shamator

yimtsüing aser Shamator jila semdang aser nüburttem nem pamphlets balala lemja liasü.

Maneni Pfutsero Administration Department den longjemer Phek DLSA-i, ADC Conference hall, Pfutsero den shisatkten sentong ka ayongzüka agiogo. Sentong nung Wekhrope Marhu-i, Right to Education aser National Food Security Act indang jemi aser Project Assistant Keneino Swuro-i 'Lok Adalat, Legal services aser Social Welfare Department' kübok scheme balala indang jemi. Sentong nungsa Dr. Riku Khutso EAC, Pfutsero-i o tatsüka jemi aser iba sülen sentong nung lemsatepba onüktem dak ajemdaker sensaksem agia liasü. Iba seminar nung yimtsüing 26 nungi nisung 49-i shilem agia liasü.

Wokha DLSA-ia, October 16 nü Sankiton yimtsüing nung Nyiro, Chukitong, Englan, Sungro, Ralan, Wozhuro, Lotsu., lower range, Middle range, Wokha Circle kübok NGO aser Arogo lenirtem atema Lok Adalat, Legal Services, RTE, Food Security Act, Health & Welfare Schemes dak sendakba nung awareness sentong ka ayongzüka katsüogo.

Zunheboto nunga Sumi Baptist Church Zunheboto Prayer Fellowship, South Point (E) colony nung October 12 nü Legal Awareness sentong ka ayongzüka agiogo. Sentong nung shisalen agütsür, Retainer Lawyer, ZDLSA, Easter H Yepthomi-i RTE, National Food & Security Act, Social Welfare schemes aser Health Schemes dak sendakba nung tangazükba agütsüsü. Iba sentong nung nisung 60 shi-i shilem agi aser parnok nem leaflets-a lemja liasü.

## NHRC züngsem Jyotika-i OSC Dimapur semdang



**Dimapur, Mongputeni/October 20 (TYO):** National Human Rights Commission (NHRC) züngsem Jyotika Kalra den Insp. NHRC Jintu Sakia-i, October 19 nü One Stop Centre (OSC) - Sakhi, Dimapur

semdangogo. Lai, Social Welfare Department, SRCW aser OSC team ketdangsurtem den sensak asem aser Dimapur nung aser state ajunga OSC inyaksangshi asadanga liasü.

Kalra-i team dang legal rights dak rangloker awareness sentongtem tali ayongzüka agütsü ajungshi. Laisa, OSC team dang maneni bendanga agütsüshir inyaksü ajunshia liasü.

## Naga Mothers' Association-i asükhu lemsatep

**Dimapur, Mongputeni/October 20 (TYO):** Naga Mothers' Association (NMA)-i sangdong ka ajanga asür Atoka Kinimi'er (Addl. Secretary, NSCN (K)) kinungertem den asükhu lemsatepogo. Tulusang Tsüngremi pa nem teti tatem makadak anisüngzüc agüjang aser par kibong aser NSCN (K) nung külem tenzükertem nem anisüngzüc agüjang ta sarasademtsüba parokisa kasa sangdong ajanga lemsatep.

"Onoki adianu tsüngda tanaben azütokshiba aitsür aser ochi oebandang ka akhanger. Nisung tepsetba ya Tsüngrem

aser nisung tsüngda kecha temeden mali," ta NMA-i ashi.

NMA-isa, NPGs telok ana nungi lenirtem aser tanga NPG tem dang, Naga nunger atema teti asoshi yimjung bener arutsü atema yongyaa atatepba mapang yimjung nung alitsü atema jenjang tapet agütsü asoshi mepeshia metetdaksüogo.

Yimjung bushiba atemer joko ojang dang azütokshitsü atema Naga Mothers' Association-i külem adianutem ayongzüka, NMA media cell sangdong ka ajanga metetdaksü.

## Oct 21 nü Police Commemoration Day amungtsü

**Dimapur, Mongputeni/October 20 (TYO):** Director General of Police, Officers aser Nagaland Police kübok rank ajak October 21 nü 8:00 ako nungi tenzüka New Police Reserve, Tennis Court, Phesama, Kohima nung Police Commemoration Day Parade amungtsü.

Deputy Chief Minister, Nagaland-i, commemoration parade sentong nung o jembitsü

aser covid agi asür kinungertem nem ex-gratia agütsüsü.

Sentong nung DGP, Nagaland-i o jembitsü aser Nagaland Police kübok covid agi asürtem nem tetushi agütsüba sentong dena agütsü.

Maneni sentong nung Nishan and Angrakshak Toli sentong agütsü aser Dy.CM, DGP-i anir naro toktsüba sentong agütsü.

## Tuensang nung PMKSY kübok seminar ka agi

**Dimapur, Mongputeni/October 20 (TYO):** Pradhan Mantri Krishi Sinchayee Yojana (PMKSY) kübok District Horticulture Office, Tuensang-i ayongzüka C.K.S Hall, Tuensang nung October 18 nungi 20 tashi stakeholders tem atema seminar ka ayongzüka katsüogo. Iba sentong ya "Per drop, more crops" omen nung ajemdaker agi.

Seminar nung shisalen agütsüri, drip irrigation koda tongtibang aser koda benoka inyaksü iba idang tangazükba agütsü. Pai, iba inyakyim ya tsünusenpongtsü indaksütsü atema tzü aser nutrient delivery system tajungtiba lir, aser drip irrigation system amenokba ajanga tzü dang masü saka mapang aser senotsüa kümzüksü, ta ashi.

Maneni pai aluyimertem dang mapa meranga inyaksü aser

department-i agütsüba resource tem takokba tashi tajungtiba nung amshitsü ajungshi, kechiyong iba inyakyim ajanga tsünusenpongtsü timba adokdaksütettsü aser kasa mapang nung tzü aser ali temo, energy aser tsünusenpongtsü kümzüka toktsüba products tem dena wazüka yutettsü, ta ashi.

Iba sentong ya Horticulture Inspector, Chemlila Sangtam lenisüba nung agi aser Horticulture Inspector, C. Yongkonglimba-i lokti pelaa agizükba den sentong koda tongtibang iba indang lemsatep. Sentong nung shisalen agütsürji Technical consultant, M/s Solar Nation Dimapur, Topong Chang liasü.

Iba sentong nung PMKSY kübok yimtsüing balala nungi beneficiaries temi shilem agia liasü.

## School Education-i quize tetoktepba ayonger

**Dimapur, Mongputeni/October 20 (TYO):** Directorate of School Education-i, India's Independence Movement aser National Unity (India Quiz) onük nung ajemdaker October 29 nü Kohima nung Quiz tetoktepba ka agütsü aliba metetdaksüogo. Iba tetoktepba ya Azadi Ka Amrit Mahotsav kübok Unity Week amungba nung shilem ka asütsü.

Iba tetoktepba atema school temi (Govt. & Private) class 10 aser 12 tsüngda aliba kaketshirtem asemsem shimtsü aser parnok indang osang tejangja School Monitoring Portal (<https://school.dosenl.in/>) nung agüja aliba ACTIVITY REPORT' Tab nung 23/10/2021

nü tashi nungbo züngoksemtsüla, ta kasa sangdong ajanga metetdaksü.

October 25 nü preliminary Online Screening Test ka agütsü aser iba atema osang tejangja October 24 nü <https://dosenl.in> nung agütsüsü.

State Level nung takok anguba team asem nem kuli kakat den senpet 10,000/7,000/5,000 agütsüsü. Kasa mapang nung tetoktepba nung shilem agir ajak nem kuli kakat agütsüsü. Tetoktepba nung shilem agütsü aruba kaketshirtem aser parnok meiner aruru nisung ka indang senzüsepong taa ajak Department-i agütsüsü, ta sangdong ajangsa metetdaksü

## JNVST 2022 & LEST 2022 atema online registration tenzüko

**Dimapur, Mongputeni/October 20 (TYO):** Jawahar Navodaya Vidyalaya, Longnak, Mokokchung, office sangdong ka ajanga, JNV Selection Test 2022 aser class IX Lateral Selection Test 2022 atema tejangrartemi online ajanga züngoksemtsüta, ta metetdaksüogo.

Tatidang atema online portal ajanga züngoksemtsüta aser iba atema NVS website [www.navodaya.gov.in](http://www.navodaya.gov.in) nung linük agüja lir.

Application benoktsü atema tatemangbuba anogoji November 30 aser October 31 nü asütsü, ta kasa sangdong ajanga metetdaksü.

## Himanta-i Assam nung tayimtsü ajanga tesendaktep ajungketsütsü mepeshia



Himanta Biswa Sarma-i Mongolbarnü virtual senden ka nung Union civil aviation minister Jyotiraditya Scindia dang Assam nung tayimtsü ajanga tesendaktep aser tayimtsü timba senzüdaksütsü atema mepeshia asüngdang.

**Guwahati, Mongputeni/ October 20 (Agencies):** Assam chief minister Himanta Biswa Sarma-i Mongolbarnü virtual senden ka nung Union civil aviation minister Jyotiraditya Scindia dang Assam nung tayimtsü ajanga tesendaktep aser tayimtsü timba senzüdaksütsü atema mepeshia asüngdang.

Mongolbarnü Chief minister Sarma-i Union minister Scindia den virtual senden nung Guwahati, Jorhat, Dibrugarh, Lakhimpur aser Silchar nung airports tem atsülangshitsü aser infrastructure ajungkettsü shidanga liasü.

Guwahati kübok Koinadhora nung Union minister den sensaksemba mapang chief

minister Sarma-i Scindia dang Haflong nung heliport ka yanglutsütsü mepeshia aser iba atema ali Assam sorkari ministry nem agütsütsü ta ashi.

Dima Hasao district headquarters Haflong nung heliport ya Nagaon aser Galeki nung heliports yanglutsü aliba den yongrü ka nung asütsü. Item heliports tem atema asameyang tembangogo aser maparen yakta tenzüksü, ta Chief Minister's Office (CMO) sangdong ka ajanga metetdaksü.

Maneni Karbi Anglong terenlok asoshi Assam sorkari nangzükba nung shilem ka ama chief minister Sarma-isa, union minister dang Karbi Anglong nung Greenfield airport ka yanglutsütsü mepeshia.

Pai ashiba agi, airport yanglutsü atema ali acre 3000 dak tema tazüing lir.

Chief minister Sarma-isa, UDAN scheme kübok Assam nung bendangleni tayimtsü yok tenzüksü atema Union minister dang teyari meshi.

Bendangleni tayimtsü yok tenzüksü atema Assam sorkari passenger catchment area dak sendakba nung osang Civil Aviation Ministry dangi yoktsü.

Transport minister Chandra Mohan Patowary, principal secretary to the chief minister Samir Kumar Sinha, principal secretary to transport Dr. KK. Dwivedi, principal secretary to environment and forest, Avinash Joshi nungera iba senden nung dena liasü.

**Piles Anepaluba** - H.Umar Chesam dang alakteta pelaba metetdaksur.

Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajsüaka, tang H. Umar Chesam contact no.

8416087414 / 6909717178 National awardee H. Umar Chesam

Address: Burma Camp 2nd Police point opp. tetuyuba nung anidaka

surgery kecha magii (non-surgical) anepalur anogo ishika tsungda ni taneptsü ngua

liasü aser iba sülen tanü tashi kü temang nung timtem kecha mali. Time: 9 AM - 5 PM

Yours sincerely - Chunwiliu, Add: Mhaikam



## Agartala nung Bangladesh sorkar indang film festival thinen

**Agartala, Mongputeni/ October 20 (Agencies):** Bangladesh nung lokti nung nütsüng agi ajema aliba nüburtem amakba temulungdang yur Agartala nung Bangladesh sorkar indang film festival ka ayongzüka agitsü aliba thinenogo. Iba benjung ya Brehostibarnü nungi tenzüka anogo asem amungtsü liasü.

Agartala nung Bangladesh Assistant High Commission ketdangsür kati, mepaitoktetba tensa kar ajuruba ajanga film festival thinentsüsa aküm, ta ashiba media sangdong balala ajanga metetdaksü.

"Iba film festival nung October 21 nungi 23 tashi film 35, Rabindra Satabarshiki Auditorium nung screen asütsü liasü. Film tem ya timba 'Mukti Yuddha' (1971 Liberation War of Bangladesh) indang liasü," ta ketdangsüri ashiba osang ajanga metetdaksü.

Kasa mapang nung Tripura chief minister Biplab Kumar Deb-i, Mongolbarnü Bangladesh sorkar dang par linük nung nübu agi ajema aliba loktitem taküm, kiojen aser tekülemdak kümsüka toktsütsü mepeshia metetdaksüogo.

Tawa Bangladesh nung Hindu nungertem amakba ya Assam aser Tripura nung lokti

tentet balala, political party aser takotet nisungtem aikati aitsüogo.

Kidanger linük nung azütokshi lendong atalokba anema lokti tentet balalai longkak aitba sentong ayongzüka agiogo.

Lokti tentet balalai Agartala aser Guwahati nung Bangladesh Assistant High Commissioners den ajurutepa parnok dang par sorkar dang Hindu nung amakertem anema jenjang tapet agitsü atema mepeshitsü shiogo.

Media osang balala ajanga ashiba agi iba lendong ya taoba hopta Comilla nung atalok. Durga Puja amungba tesem ka nung Quran ka mezüngmeshi amshiba olulu osang social media nung prokshiba sülen iba lendong atalok.

Durga Puja pandals amakba dak sendakba nung Chandpur, Chittagong aser tanga tesemtem nung nisung aika pua lir.

Hajiganj, Chandpur, Noakhali, Cox's Bazaar, Chattogram, Chapainawabganj, Pabna, Moulvibazara, Kurigram aser tanga tesemtem nung mepetmesü adokba osang sangdongogo.

Kasa mapang nung PM Sheikh Hasina-i aibelena alirtem merenshitsü nangzükogo.

## Taoba Mizoram BJP otongdar Lalhriatrenga Congress nung denogo

**Aizawl, Mongputeni/ October 20, 2021 (Agencies):** Tuirial Assembly menden atema by-election magi tsüngda, taoba mapang Mizoram BJP otongdar Lalhriatrenga Chhangte Congress nung denogo.

Kolasib district kübok Tuirial by-poll ya October 30, 2021 nü agitsü renema lir.

Mizoram Congress tir Lal Thanhawla-i, Lalhriatrenga Chhangte, shiba Indian Bureau of Mines nung Deputy Controller of Mines ama mapa nungi anena liasü, pa Mongolbarnü Aizawl kübok Congress Bhavan nung sentong ka agiba mapang party nung anioka liasü.

Chhangte, shiba 2018 küm January nung taoba Chief Minister, Lal Thanhawla anema ken o benokba sülen, Mizoram nung nübur ajaki pa tali jangjaa aküm, pai Congress nung adenba ya telok atema tajangzük tulu asütsü ta political analysts kari asatetogo.

Chhangte, shiba State nungi mezüng mining engineer liasü,



Lalhriatrenga Chhangte (File photo)

pa2019 küm April ita "independent" ticket nung Lok Sabha election nung toktep aser taküm April ita BJP ticket nungi Serchhip Assembly by-election nung toktep, saka anaprongla nung pa tamakok angu.

Iba sentong nung o jembiba mapang, Chhangte-i, taoba mapang tsükchitep ajak toktsür state party tir Lal Thanhawla-i pelashishia agizükba sülen ni Congress nung aden.

State nung terenlok lidaksütsü aser Mizoram nung nüburtem ajungkettsütsü tejangraba tulu yur Congress nung adener, ta Chhangte-i ashi.

### GOVERNMENT OF NAGALAND DIRECTORATE OF SCHOOL EDUCATION NAGALAND : KOHIMA PRESS RELEASE

Kohima the 18th Oct. 2021

NO.ED/SE/PHEK/8/2014-15:In continuation to Advertisement ED/EST-1/ADV/Exam/2020-21, Dated 17-09-2021, and in compliance to the Hon'ble Guwahati Court Kohima order dated 23-08-2018 in WP© No.326 (K) of 2017, the advertisement of 1(one) post at GHS, Khulazubasa under the establishment of DEO Phek, the following information are given to the candidates who had applied for the same.

1. There shall be both Written Examination consisting of 80 marks and Viva-Voce of 20 Marks.
  2. The Syllabus for written examination shall consist of:-
    - a) General English 30%
    - b) General Knowledge 30%
    - c) Professional Course 40%
  3. Date of Written Examination - 25th October 2021
  4. Date of Viva -Voce 26th October 2021
- Venue - Directorate of School Education, Nagaland, Kohima.  
Time - 1:00 PM - 3:00 PM
5. The candidates are requested to collect their Admit Card personally on 22-10-21 during office working hour.
  6. Henceforth no separate calling letter will be issued to the candidate.

(SHANAVAS C) IAS  
Principal Director.

Issued by DIPR

### GOVERNMENT OF NAGALAND DIRECTORATE OF SCHOOL EDUCATION KOHIMA NAGALAND.

NO.ED/SCH/PMS-3/2019-20 Dated, Kohima, the 13th October 2021.  
**REMINDER ON PRE-MATRIC SCHOLARSHIP FOR MINORITY STUDENT UNDER MINISTRY OF MINORITY AFFAIRS.**

It has come to the notice of the undersigned that many Institution Nodal Officer have not yet updated their profile as well as linked their Aadhaar with contact Number without which, their students application cannot be verified. Therefore, the Department once again remind the Institute Nodal Officer's to update their profile and link their contact Number with Aadhaar failing which disciplinary action will be initiated against the institution.

Cabinet Secretariat hasdirectedto implement the following measures to further secure the portal.  
1. Authentication of L1 & L2 officers: Aadhaar based demographic authentication of Institute/ District Nodal Officers (INOs/DNOs) has been made mandatory prior to the verification of the applications by them for which the INOs/DNOs have to provide their Aadhaar number on the NSP Portal.

The facility of the Aadhaar based authentication of L1 and L2 level officers has been made live on the NSP Portal and the OTP generated during the process will be sent to the mobile number registered with the Aadhaar of INO/DNO/SNO. NSP will be using the same mobile number for all communications and sending OTPs in the future. The procedure for the KYC for new Institute Nodal Officer is given in the Portal under SERVICES section. The NSP login of the INO would be operational post completion of KYC at the NSP using Aadhaar number of the INO.

Sl.No	Activities	Date
1	Last date for Submission of Online applications by the students.	15 November,2021
2	Last date for first level (Institution) verification	15th December, 2021
3	Last date for second level (District) verification	31st December, 2021

(SHANAVAS C) IAS  
Principal Director.

Issued by DIPR



## TIR YIMYIM YIMOBILEM (EDITORIAL)

DIMAPUR YANGTEPNÜ, MONGPUTENI(OCTOBER) 21, 2021

### Asenok menüdong makümtsüla

**N**aga yimten ken o tatembang kati marutetba atema ya kecha süngmangtsü mali, kechiyong ibai ken o temelaba ka masü, anungji mapang agiba ya tim dang lir. Ajisüaka, asenok Naga nungertem asoshi shisabolutsü kaji, Naga yimten ken o tatem küma melatettetba ya masü saka India government den tejembidak nung Naga nung yimten nüchiso bushirtem rongnung NNC telokang teimba aser ano NSCN teloktemang teimba ta telok balala küma razüka aoba ya asütsü. Ibayongji, tangbo Naga yimten tebilemtsü ya India den dang masü saka Naga nungertem rongnungang tangatettep kati arutsü tasakba kümogo. Naga yimten nüchiso bushir teloktem o India government nabo tejembitsü tashibo ajak jembimaa jembioigo aser ken o ajak tembanga jembioigo ta metetdaksüba sülenang, ano NSCN-IM telok o taoba India tenüng nung jembir, R.N.Ravi na tsüngda Naga nung yimten wako aser temzüng dak aketba ken o nung tiyongtsü kati arua majuruptet senshiba sülen, tang Ravi melena Mishra den jembir tenzükgogo, saka nisung melen dang ashi, telok anaprongla tsütsü tangatetbabo memelenshi kasa nung dang nokdaka lir asünungji, parnok tsüngda yaktabo kecha telemtetba tajung kati arutsü meimlar. Ibaji, Naga nung ajak asoshi osang tajung masü saka Naga nung asoshi iba dang nungi osang tamajungba kaji, ano NSCN teloktem rongnung NSCN (R) telok talila ka akümtsü ana nung lir ta angazüker. Nübertembo tan Khristmas benjong matongdangsa India den Naga yimten telemtetba katibosa arulanglang ta imlaa atar saka Khristmas matongdang, Naga yimten telemtetba kati arutsü melen ano NSCN telokang talila kar razüka orr kümer lira, asenok Naga nung alima tsüngdang menüdong kümer alitsü. Atangji, yimten nüchiso atema raraba mapa nung timtem aika lir, anungji teshisadang aser taremsük kanga nungdaker. Ajisüaka, yimten ken o nung obang mapu adok shia telok kaka razüka ao nungbo, oda odabo nisung shia telok kaka kümer anentsüsa akümtsü. Joko, asenok rongnung nüchiso bushir telok aika aküm nungji, nükjidongbo nüchiso saka tebilemba balala kümogo. Atangji, joko Naga yimten nüchiso indang jembir küm noklang jungdi asür, anungji Naga nung yimten tongpangji India temzüng aser India wako kübok jenjang tajungba ka nung Naga kin alitsüba masü saka kenyongi yimten balala ser Naga nungertema Naga nung temzüng aser wako ka kübok ser India den kidanger tajung ka ama alitsü asoshi raraan aruba yimten nüchiso tongpang lir. Iba tongpang nung Naga nung senti taküm aika lalugogo aser aika taküm lemdaogo. Ano, Naga yimten nüchiso tongpang nung takoksa, timtem aser maksü majurudangba Naga nung kibong aikabo malitsü. Iba ama tasüa majem, arem nung ali chia aser süngo tu mejaka taküm ajak bendanga agüja pei tetsü tasolima asoshi raraan arur, India temzüng aser India wako küboksa alitsüba Naga nung yimten zü aketer mulungjangibo magizüktettsü. Ajisüaka, asenok tia majung tanü putu nung Naga nung yimten nüchiso asoshi raraba tongpang aser iba tongpang nung nokdakertem tangatetba, jakla aser taküm yimya balaka kümogo. Akhidang ama masü, ka telok, ka telok ta mali, Naga nung tetsü tasoli asoshi machimarem aser sensak arema yimten ken o jembir mali kümogo. Joko, teimbaka yimten nüchiso dang nungibo alima rongsenang aser jangratemang temeimba kümogo. Ibaji asangsang nung tanü Naga yimten nüchiso tongpang nung nokdakertem tia lir. Ibayongji, yimten nüchiso asoshi raraba tongpang tesashiba akümer masü saka A,B,C,D ajak jamatsüsa telokang teimba teimba akümba asenoki angur. Iba ama tensa ka nung asenoki asenok temetensa jembia tekong merangra asenoksa akoksatsü aser nüchi masü suwar kümer maksü ajurutsü ana nung lir. Ashiko, imlaba ama tan Khristmas tashi nung Naga yimten ken o ya tema telemtetba kati marutetra, India tsütsübo ken o agi melaki küm tasen nunga jembia onütsüa akok, ajisüaka asenokbo telokang teimba kümer, shiba den jembir shiba denang mejembi ka Naga yimten ken o temdaka ayutsüsa akümtsü. Item tia ajakji yimdangi arua bilemdanger, India sashiba agi masü saka asenok mekokmein aser tipmadem jakla yimyatem ya angateta, yaktsa yakta ano telok talila anasemka küma moadang, Naga yimten ken o ya lateta adoktsüla.

## OLEMSABANG

### AO OSHI SAMATSÜ TSÜBUR

- P.Renthy Jamir

Ao oshi meimer aikati iba oshi ya samatsü ta tsübuseta züluba angur. Nibo Ao oshi ya kodanga mesamatsü ta bilemer. Tang Ao litsü telongtet nung alir yim aser jila 120 nung Ao oshi jembir, ano Ao litsü ajanger Aor Arogo 43 nung iba oshi yagi sayur, ken atener. Asen kidanger Lotha nunggerbo joko International Standard Dictionary ojang lakh kasür meyerijang metsür tenet adokba asenoki nguogo. Anungji Ao oshia tang meyi tenet ojang adoka aliba osep jagi ojang lakh tema kümdaktsür adoktsü merangtsüba dak alema oshi samatsü tabo arentaka malitsü tim ta bilemer.

Aor Chungiyimti lima nungi Chungli oshi aser Mongsen oshi ana külemi jembia aruba tanü tashi kasaji jembir. Ano kari ashir kenbo Mongsen o nung atener. Masü Aor tsürabur ken ajakji kodang junjunga bushidangdir ken mejemer tajungtemi ken tajung mejemba ajakji tesadang ka Chungli o aser Mongsen o temeyoktep lir. Aser tesadang kaji Sangro oshi (poetic language), Chungli oa masü, Mongsen oa masü ta temeyoktep lir. Iba ya sobaliba ken ashirtemi tajungba meteta lir. Asenok ya tangar dak tajung majiteter tamajung dang ajitettsür. Atetapong tilubanglutsü nung atimechia majung. Anungji tetsür ka tebur ka süia ngura langkabo ajitettsür. Anungji Ao oshi mesamatsü atema nisung ka dak tema tereprangtsü koma koda jembir ojang ishika yangi zülur (tobur ajung majung).

- i. Ametameter - Tetsür temang tulu masü tereprangtsü jungjunger.
- ii. Atoa or - Tetsür tejemi tulu tereprangtsü mazü atoa oa jajar.
- iii. Anguangur - Tebur tera tamachi mesük makümmakümer kecha tepera mali yamala nisung dang ajar.
- iv. Ayangayanger - Tongtibangsa tetsür aso tulu masü ila ilar saka tajinütsüka renemrema junger.
- v. Jangnem - Tetsür aso onsara tila temanga tila tar-a tatsü.
- vi. Kokdangmatang - Tongtibangsa tebur aso tamajung tobur tamajung tereprang majung.
- vii. Kolong - Temang tilabo masü saka tar tatsü nari nari, an kolong mesük.
- viii. Chilongchilonger - Tongtibangsa tanur yirayirar temeimtsüka.
- ix. Lalalalar - Lenden metong mesütep tera tilasür talang.
- x. Meyongmeyonger - Tetsür temang tila tar talanga masü saka tereprangtsü anepaneper jungjunger.
- xi. Matibangdi - Tetsür or tanur yirayirar jungjunger.
- xii. Mesüngmeyonger - Sentsü tera temesüng nisung.
- xiii. Nakpokshok - Sentsü tap, aut sentsü, tanak masü temesünga masü, sentsü tepuzük.
- xiv. Onglang - Tar talang saka aso o tar mesütep tajinütsü maket amjang anela mesük.
- xv. Palongpalonger - Yirayirar palongpalonga mesünger ta-a jembir.
- xvi. Pulapular - Sentsü mali kongrakongrar.
- xvii. Roklang - Tajinütsü maket tekong talang, tar talang.
- xviii. Rajang - Tila tatsü terinem tashi joko taintsüla masü.
- xix. Rangto - Iba ya Rajang den tepila mali saka o taretba.
- xx. Tembi - Tar onsara tatsü tereprangtsü majung.
- xxi. Telutera - Yirayira temang kanga tulubo masü.
- xxii. Renemkonemer - Tetsür tereprangnütsüka, temang tetsüng tepen sütepsüteper aso tulu masü.
- xxiii. Warowaror - Tetsür teyira-a masü tekongra-a masü tereprangtsü jungjunger.
- xxiv. Waklongwakshi - Tera teyira saka temang kirka masü tawak amai, tereprangtsü majung.
- xxv. Züsemtsüngdang - Temang onsara tulu tar tatsü.

Ano yamala ojang Lapi ta Pokra ta aika lir. Aser tobur tajung tamajung nungja jayajako tetsür, tebur atema tabensa lir.

Otembanga, Ao oshi mesamatsü tongtibang ojang ka bena arudi. TIR - Kodang Tir ta shidir iba ya tetsüri amshitsü makok. Tir Yimyim koba küm 19 tain lir iba ya tebur nungja, Aor sobaliba nung tetsüri yimyim mayimer. Tir, tebur nungja (masculine gender) Arju yabo tebur temeja aser Arju Tir ya arürleper nokinketer dang shimmer. Par Arju nung arürshi-i aoba ajak nung pa asa-lendong agitsü. Arür lepseter aruba ajak par kimen sür par kima nungi Mangkoterongi atutsü. Ken NO. 261 nung toa Khristan Arürshir Tir ola Angang ta atener. Chuba tasüra aji tebur Tir ya mendenbula agi melentsü makok. Anungji tetsür nungja ka bushitsüla, ajia akatsü. Süra Ao oshi mesamatsü. Ao oshi teimba bushitsüba dak alema ka agi ana repa amshitsü tim masü ta bilemba shisa lemsateper.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Myanmar nung sepaitemi Caritas nung inyaker tenet apu



Caritas Myanmar züngsem kar noksa nung angur.

**October 20, 2021:** Myanmar nung sepaitemi Catholic Arogo indang social arm- Caritas (Karuna) nung inyaker tenet puogo; rara adoka aliba Kayah state nung jenshia alirtem-internally displaced persons (IDPs) nem teyari agütsüba mapa inyakra mapang nung parnok apu, ta osang ka ajanga metetdaksü.

Khristan nütsüng aika aliba Kayah state kübok Loikaw Arogoi, "October 18 nü Caritas nung inyakerkem chiyungtsü aser mozü bener aoba mapang nung state yimtiba, Loikaw nung sepaitemi parnok apu," ta metetdaksü.

Osangbener den jembidang

Khristan lenir kati, "Onoki jenshia alirtem nem teyari balala agüja arudar. Parnok nem tejenokdak, mozü aser chiyungtsü agüja arudar," ta metetdaksü.

Arogo lenirtemi tang pua alir Caritas züngsemtem chioktsü atema inyakdar.

Khristan nütsüng timba aliba region nung May ita nungi sepaitem aser telok balala tsüngda raraba ajanga nisung aikati pei talidak yutsür jenshiogo aser Arogoi jenshia alirtemji Tenla kitem aser camps nung jenokdakja yaria arudar.

Kayah state ya kanga tezülen lir aser Myanmar ya

Buddhist nütsüng timba aliba linük ka süaka Kayah state nungbo Khristan nütsüng timba lir. Nütsüng 355,000 aliba state nung Catholic Khristan nütsüng 90,000 shi lir.

Kayah, Chin aser Kachin state tem nung sepaitemi Tenla ki aika raksatsüba den külemi putirtem aser pastor tem densema Khristan aika puogo.

Myanmar nung küm aika civil war aliba mapang nung sepaitem ket nung Khristantem kanga reshikangshia arudar.

Taküm February 1 nungi sepaitemi yimsüsüba tenzükba sülen tang tashi nung nisung 240,000 dak temai pei ki toktsür jenshiogo.

# Missionary 17 chioktsü atema dollar sen million 17 akhanger

**October 20, 2021:** Anogo ishika tejaklen Haiti linük nung prangpong amer telok kati Canada nunger ka densema America nung missionary 17 apuba sülen iba telok jagi missionary tem chioktsü atema missionary shia dollar sen million kaka agüjang, ta takhangba agütsüogo.

Taoba Honibarnü missionary tem jagi orphanage ka semdangba sülen gari nung meyipa aoba mapang nung 400 Mawozo teloki parnok ajak puer ao.

Missionary tem chioktsü atema parnok nisung shia atema sen million kaka agüjang ta takhangba agütsüogo, ta Mongolbarnü Justice Minister, Liszt Quitel-i metetdaksü.

"Iba telok jagi Haiti nung Christian Aid Ministries tongti dang parnok nisung shia atema sen million kaka agüjang ta metetdaksüogo. Aiben iba telok jagi akhangba ama sen magütsüteter anungji taruba anogo ishika tsüngda mesüra hopta ana tsüngda sen tera ajemang ta jembishinütsü," ta

Quitel-i osangbener nem metetdaksü.

Christian Aid Ministries-i ashiba agi, Mawozo teloki apuba missionary temji international aid organization nung inyakerkem lir.

Osangbenertem den jembidang White House Press Secretary, Jen Psaki-i, "Missionary tem lendongi maitsü atema ni parnok maitsüji memetetdaksü. Parnok kümzüka anir arutsü atema State Department aser FBI nati longjemer inyakdar," ta metetdaksü.

"Linük Tir nem osang metetdaksüogo aser State Department den FBI nati tang teinyakdak mapatem osang metetdakja arudar," ta lai ashi.

"US sensotem kümzüksü atema US sorkar kübok FBI-i inyaker. Port-au-Prince nung aliba US embassy-ia local ketdangsertem den yaritepba den külemi missionary kibongtem nungita yaridar," ta laisa metetdaksü.

Hombarnü Christian Aid Ministries-i Khristantem dang missionary tem atema

sarasademjang, ta mepishiba den külemi osangbenertem danga pelaba lemsatop.

"Onok kübok inyaker 17 Haiti nung apuba sülen anogo asem jungogo. Osangbenertemi alima tesem ajungalen iba osang prokshio. Haiti aser United States nung ketdangsertemi tatalokbatem meteta lir aser yaridar. Onoki iba tensa mita atadar aser sarasademdar," ta Christian Aid Ministries-i metetdaksü.

"Amish aser Mennonite densema alima tesem ajungalen missionary tem atema sarasademtsürtem dang onoki pelar," ta parnokisa metetdaksü.

October 16 nü missionary 17 jagi lajartem anepaluba ki-orphanage ka semdangba sülen parnok meyipa aoba mapang puer ao aser tang parnok Port-au-Prince anasa lir, ta osang angazüker.

Honibarnü Khristantem jagi Croix des Bouquets area nung aliba orphanage home semdangba sülen Titanyen-i meyipa aoba mapang nung parnok apu.

# ANOGO ABEN TSÜNGREM DEN

## Anogoji tanü asütsü akok

*Idangji asenok taküm alir, anünga alirtem, anüng nung Kibuba den ajuruteptsü parnok den külemi mepet nung ayipa atutsü. Aser yamaji asenok teti Kibuba den alitsü. 1 Tesalonika 4:17*

Pauli arogo ayipa atuba indang jembir. Yisu alimai alutsü (t.16), aser pa pur anitentsü, Pa aruogo. Khrista nung asür tama shia arutsü, parnok tanela Kibuba den lir, parnok shia aruba temang tasen Kibuba den lungjemtsü. Aser shirnok taküm alir parnok den külemi Kibuba den mepet nung ajuruteptsü asoshi ayipa atutsü. Ibaji Yisui Yohan 14:1-3 nung ashibaji lir, "Nenok pei dangi agizüktsü asoshi Ni tanaben arutsü." Ibai küm tenet rishikangshir külen Yisu obendangtsüi aruba den maitetptsüla. Laishir aikati ayipa atubaji timtem masü dang ataloktsü ta ratettsür, aser küm tenet timtem rishikangshi matalokdang Khristai Pa nübur, arogo alima nungi agiener atatsü aser Pa O bendangba arutsü.

Rishikangshi nung amangba mesüra rishikangshiba sülen amangba mesüra rishikangshi teyalung nung amangbaji tongtipang tebilemstsü masü. Tamanger shiai bilemstsübaji, "Teti tatem maka mapang ni kong intoktsü?" Ibai tongtipang tebilemstsü lir. Yisu kodang arutsü shingaia memetet. Ibai küm 500 sülen mesüra minute 5 tsüngda arutsü shingaia ashitsü makok. Shirnoki Yisuiji Kibur ta amanger (Rom 10:9,10) parnok teti tatem maka Yisu den alitsü, shirnoki Pa magizüker teti tatem maka molumi nung alitsü. na renema lir ma? Mapangji tang asütsü akok.

Kibuba, ni kü taküm na asüng arutsü ama alitsü, kechiaser arutsüa kar.

# Myanmar nung Baptist pastor tem densema nisung 5,000 chiok

**October 20, 2021:** Myanmar nung sepaitemi jail nung puoka alir 5,000 dak tema chiokogo aser parnok rongnung Kachin Baptist Arogotem nung pastor asem densema lir.

Yimjung atema sarasadem sentong ka ayongzüka agiba atema pastor temji pua liasü.

Kachin Baptist Convention nungi pastor tem rongnung arrshi küm 70 ka densema lir aser pajibo high blood pressure agia timtema liasü.

Taküm February 1 nü sepaitemi democracy lenirtem pua yimsüsüba tenzükba anema longkak aiterem 4,320 pua parnok anema ken o benoka liasü, ajisüaka sepai tongti, Min Aung Hlaing-i parnok dang tachocho sayua October 18 nü chiokogo. Parnok dak alia tai tonglokja alir 1,316 chiok.

Association of Southeast Asian Nations (ASEAN) summit October 26-28 anogotem nung agitsü saka iba senden nung adentsü atema Min Aung bo mejaok. Tepuokdak alirtem aika

chiokyonga democracy lenir Aung San Suu Kyi aser Win Myint nabo mechok.

UN special rapporteur, Tom Andrews-i, "Myanmar nung nüburtemi meimchir temeden aser linük kümzüksü atema alima linüktemi parnok nem sen, raraba hadir aser temeden agütsütsüla," ta metetdaksü.

Kachin state nungi pastor temji taküm June 28 nü pua liasü. March 3 nü Putao district kübok Naungmoon jila nung linük nung yimjung atema sarasadem sentong ka ayongzüka agiba atema Rawang Literature & Culture Committee chairman-i pastor tem nem tai tonglokja liasü.

Tang Kachin aser Shan state na nung rara ajanga nisung aikati pei ki toktsür jenshiogo aser Kachin Baptist Convention-i tongti shilem agia jenshia alirtemi yarir.

Taküm February 1 nungi tenzükba Myanmar nung sepai yimsüsüba kübok nisung 1,100 jungnüa tepsetogo aser nisung 9,000 dak tema pua liasü.

**OLONG PAITEP # 5972**

1				2				3		4
5		6								
							7			
8										
										9
		10				11				
				12				13		
14										
						15				
16										

<b>TIPLÉN</b>		<b>LANGTSÜNGLEN</b>	
2. Auo nung chiyongtsü asenba	- (7)	1. Lenmang	- (7)
5. Mangyimba mapang	- (5)	2. Aor kidong ka tenüng	- (6)
7. O tamendakdak	- (4)	3. Tenarong maten	- (6)
8. Pei dak malangba	- (7)	4. A _ _ _ g	- (3)
10. Juli	- (7)	6. Mopung apodoka	
12. Sen ayudak	- (7)	ola adokdaksüba	- (3)
14. Tenük agi ajitet	- (4)	9. Tongtipang tagitsü	- (7)
15. Tamajung aküm	- (5)	10. Menungra bilem	- (6)
16. Apuso	- (7)	11. Aiür	- (6)
		13. S _ _ _ k	- (3)
		14. T _ _ _ r	- (3)

**OLONG PAITEP # 5971 TELANGZÜBA**

<b>TIPLÉN :</b>		<b>LANGTSÜNGLEN :</b>	
1. Yiar, 3. Tesola, 7. Yimra,		1. Yimti, 2. Amen, 4. Shiner, 5. Alaka,	
8. Tangar, 9. Peria, 10. Tanur,		6. Satan, 9. Putet, 10. Tembar,	
11. Tasen, 13. Lemjem, 15. Tambu,		11. Tatok, 12. Amang, 14. Jala.	
16. Khuret, 17. Sang.			



**TANGAR INDANG MEBILEMDANGI TEJEMBI :**

Künü anogo driver Merenba indang truck ji yi ayokba kima anena ngur dang tangar indang tejembinüset Narolai Merenbaji teti yi jema nemzura ta tajurur ajak dang ashi. O kanga mepulu Merenba jaki ashir"Yi ayokba kima kü truck anena ayuba jagi niyi ajemer ta kuli mesütet" ta dang ashi. Maneni Narolai Merenba yi kanga ajemer ta jembia senzür ta angashiji Merenbai joko aonungshi pa truck to Narolar kima anena ayur.

**Moral : Mejangjai tangar tenüng temenüksü.**

Lilir : WhatsApp

**TANÜBO NAI LANGZÜANG**

- Q. Shibai MyParkings App saya?  
 A. Union Minister Anurag Thakur      B. Union Environment Ministry  
 C. Finance Minister Nirmala Sitharaman      D. none

=====(Taruba adok nung onoki langzüksü)

**YASHI ADOK TELANGZÜBA :** Jyotiraditya M. Scindia

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Lazük**

(v) ali kimung asazüka agiba mesüra agütsüba ( allotment of land)  
 \* Ozü kinungertemi kü nem kidong li nung ali tilaka **lazüksü.**

**Lazük**

(v) miima metetba (intercept)

\* India sepaitemi China nunger sentong **lazük.**

**NAI-A YA METETTER MA**

**T20 WORLD CUP ASAYAMUNG NUNG 'CENTURY' (100) KA DANG NUNGI TIMBA YANGLURTEM:**

- Chris Gayle (West Indies) - 2007 to 2016  
 No of Centuries - 2      Matches - 28  
 Highest Score - 117      Total Runs - 920  
 50s - 7      4s - 75  
 6s - 60
- Mahela Jayawardene (Sri Lanka) - 2007 to 2014  
 No of Centuries - 1      Matches - 31  
 Highest Score - 100      Total Runs - 1016  
 50s - 6      4s - 111  
 6s - 25
- Brendon Mccullum (New Zealand) - 2007 to 2014  
 No of Centuries - 1      Matches - 25  
 Highest Score - 123      Total Runs - 637  
 50s - 2      4s - 67  
 6s - 19
- Tamim Iqbal (Bangladesh) - 2007 to 2016  
 No of Centuries - 1      Matches - 23  
 Highest Score - 103\*      Total Runs - 514  
 50s - 1      4s - 52  
 6s - 15
- Suresh Raina (India) - 2009 to 2016  
 No of Centuries - 1      Matches - 26  
 Highest Score - 101      Total Runs - 453  
 50s - 1      4s - 47  
 6s - 12
- Alex Hales (England) - 2012 to 2016  
 No of Centuries - 1      Matches - 14  
 Highest Score - 116\*      Total Runs - 356  
 50s - 1      4s - 41  
 6s - 10

**SUDOKU # 6013**

	4			1	5		6	
	6				3	5		7
	5	9	2		6	4	8	
6			5	4				
4	9	3			8		5	
	1			3	7		4	9
1			3					
8	3	5	7	6	1	9		4
				4	2		1	

**TELANGZUBA # 6012**

	2	4	3	8	1	5	7	9	6
	5	8	6	7	4	9	2	3	1
	1	7	9	2	6	3	5	4	8
9	2	4	6	5	8	1	7	3	
6	5	7	4	3	1	8	2	9	
3	1	8	9	2	7	6	5	4	
7	6	1	5	9	4	3	8	2	
4	3	5	1	8	2	9	6	7	
8	9	2	3	7	6	4	1	5	

**OJANG LUTEP # 5558**

- MJYII :   
 UNYIMJG :   
 OSASHI :   
 JBIEMR :   
 AKSA :   
 MCHMEIIR :   
 TNGDSÜA :   
 EITEMM :   
 LIRMEA :   
 AJOMAK :

**OJANG LUTEP TELANGZÜBA # 5557**

**TEMOLUNG AJAK AGI SARASADEMA MESHIRA  
 TEMOATSÜSANG TSÜNGREMI ASEN NEM AGÜTSÜTSÜ**

**TAN HOPTA ATEMA - KOMA SÜLA ?**

Q. Tang amai Nagaland nung oposition telok mali ser assembly election agitsü mapang tonga arununga koma süla?



October 20, 2021 nü Rampur nung Union Minister for Minority Affairs, Mukhtar Abbas Naqvi-tzumetsung agi kongshiba tesemtem semdangba mapang tangokba noksa nung angur.

**EAM, Jaishankar-i Israel Tir aser Ato kilonser na den senden amen**

**Jerusalem/New Delhi, October 20 (Agencies):** Bodhbarnü India External Affairs Minister, S Jaishankar-i Israel Tir, Isaac Herzog aser Ato kilonser, Naftali Bennett na ajurua senden amenba mapang nung regional aser alima dak sendakba teblemstü onük balala süoka o lemtepa den külemi linük ana tesendaktep ano tajungba akümtsü atema jembio.

semdanger aser pai Israel Tir aser Ato kilonser naprongla den jurila senden amen. External Affairs Minister ka ama tang mezung Jaishankar-i Israel semdanger. Israel Foreign Minister, Yair Lapid-i jaokba nung ajemdaker pai Israel semdang. Mongolbarnüa Jaishankar-i Israel Parliament Speaker, Mickey Levy ajurua senden amenba mapang nung linük anaprongla dak sendakba teblemstü onük balala süoka o

lemtepa liasü aser region nung tatalokbatem indanga jembio. Hombarnü Jaishankar-i Foreign Minister Yair Lapid den senden amenba mapang nung linük ana tsungda Free Trade Agreement (FTA) tezungzüktep agitsü atema taruba ita nungi tenzüka ken o jembitsü bangjemogo. 2017 küm July ita nung Ato kilonser, Narendra Modi-i Israel semdangba sülen India aser Israel na tsungda asalentong tesendaktep ano tajungba kümogo.

**BJP-i küm 7 tsungda rongsenkettsung jenjang raksatsü: Sachin Pilot**

**Jaipur, October 20 (Agencies):** India nung osettsüset jenjang atuba, totzü jenjang atuba, mapa manguba teblemstü aser rongsenkettsung jenjang tamajungba akümiba atema Centre sorkar aija Bodhbarnü taoba mapang Rajasthan deputy chief minister aser Congress lenir, Sachin Pilot-i, Centre sorkari sector ajak nung linük ashioksüogo, ta aitsü. Jaipur anasa Chaksu nung Dalit nunger dak sendakba senden ka nung jembidang Sachin Pilot-i, "Tesüiba küm tenet tsungda BJP sorkari rongsenkettsung jenjang kanga mejungi raksatsüogo, mapa manguba jenjang tamajungba kümogo, petrol, diesel aser LPG cylinders jenjang kanga tasak kümogo aser osettsüset jenjang kanga tuogo," ta metetdaksü.

kürakyanglua ka semzüksü. Pilot-isa, sorkari aluyimba ozung tasen asem benokba ajanga zübo nung metzü inoktsüsemstüogo; item ozung anema aluyimertemi küm ka tashi linük tesem ajaklen longkak aiter, ta ashi. State nung Congress sorkari Dalit nunger terenlok atema akokba tashi maongka agüja yaritsü aser Bhanwar Lal Meghwal melen Dalit nunger ka Cabinet minister shimtsü imlar, ta metetdaksü. Dalit nunger Meghwal ya social justice & empowerment minister liasü saka yaküm asi. "Pa (Meghwal) ya ozü sorkar nung cabinet minister ka liasü. Tang iba menden tazung lir, anungji All India Congress Committee (AICC) aser (Rajasthan) sorkari kobi melii Dalit nunger ka nem cabinet menden agütsütsü ta ni imlar," ta pai ashi.

Yaküm Pilot-i chief minister Ashok Gehlot anema apusoba sülen pai cabinet dak sendakba nung tang mezung pai jembio. Chaksu MLA, Ved Prakash Solanki-i ayongzükbä sentong nung adentsü atema Chief minister Gehlot, AICC general secretary Ajay Maken aser Rajasthan Congress Tir, Govind Singh Dotsra nungera jaoka liasü saka par asemprong maden. Pilot-isa, Congress lenirtem-Rahul Gandhi aser Priyanka Gandhi Vadra nati Delhi, Uttar Pradesh aser state balala nung Dalit nunger aser aluyimertem atema ola adoker, ta ashi. Linük nung tetsürtem anema inyakba atema Priyanka Gandhi-i ola adoker aser takoksa angurtem ajurur; Mongolbarnüa Priyanka-i, taruba Uttar Pradesh election nung party ticket shilem 40 bo tetsürtem nem agütsütsü ta shiogo, ta Pilot-isa metetdaksü.



October 20, 2021 nü Kushinagar nung Kushinagar International Airport semzükbä sentong nung Ato kilonser, Narendra Modi den Uttar Pradesh Angh, Anandiben Patel, Chief Minister Yogi Adityanath aser Civil Aviation Minister, Jyotiraditya Scindia nunger adenba noksa nung angur.



**MOPUNGCHUKET**  
AIT LAISHIR TELONGJEM DIMAPUR

ANOGO : 23RD OCTOBER 2021  
MAPANG : 11:00 AM  
VENUE : DBIDL HALL  
DON BOSCO SCHOOL  
CAMPUS, DIMAPUR

TONGTI O JEMBIR : Wb. Imnalensa Sanglir, IPS  
SP Mon

**Sentong Lenir**  
Sp. Lipoktsungba Jamir  
Kr. Toshisangla Aier



**KUDI RAREN**

**WAIN ADI**

- Sarasadem** : Wt. Nungshisangla Lemtur Tir, Ao Temolungtsür
- Pela- a- Agizükba** : Sp. Hangi Jamir Tir, MALT Dimapur
- Kaketshir Atema Sarasadem** : Rev. Maong Lemtur
- Jubilee Ken** : I/C Wb. Enyar Jamir
- Tepela O** :  
i) Mopungchuket Senso Telongjem Dimapur (MSTD)  
ii) Mopungchuket Ait Laishir Telongjem (MALT)  
iii) Ao Kaketshir Telongjem Dimapur (AKTD)
- Nüngo Kaket Salaba Mapang**: Kr. Temsujungla Ozukum Convener, Souvenir Committee
- Tongti O Jembir** : Wb. Imnalensa Sanglir, IPS SP Mon
- Melepzung O** : Wb. I. Limatemjen Convener, Jubilee Planning Committee
- Tatem Ken** : Putu Talangka Süiogo
- Tatem Sarasadem** : Sp. Sukum Aier

**Metetdaksür:**

- 1) Taküm Jubilee mong nung wara aliba ajanga lokti senden akhi ama melitetsü, saka YouTube live channel nung online ajanga ajaki shilem agitsü mepishir.
- 2) Jubilee teimsür MALT Dimapur zonal incharge-tem alitsü.
- 3) Covid-19 nungi jembua alitsü atema tesenteper ajaki SOP follow asütsü metetdaksür.
- 4) Sentong temer chiyongba mapang alitsü.
- 5) Iba Jubilee sentong takokba nung amongtsü asoshi ajaki sarasadema atadi.



MALT DIMAPUR YOUTUBE CHANNEL

**37 BUBA DIMAPUR DISTRICT AO PENSIONERS' TELONGJEM KÜM TATEM LOKTI SENDEN SENDONG**

Anogo : 22nd October 2021  
Mapang : 10:00 am nungi  
Tesentepdak : Mr. & Mrs. Lepzuk Jamir  
DDAPT Kimen, Kevijau colony  
Dimapur Near Livingstone School Dimapur

1. Menden : Ketdangpurtem
2. Sarasademtsü : Er. Imti, Duncan
3. Tesenteper pelaa agizükba aser Tasür bilemtetba: President
4. Ni ya shinur : Mrs. Arenla Imsong
5. Osangtem agitsü : (1) Audit Osang  
(2) Nominating Committee osang  
(3) General Secretary osang
6. O lemtepa mapang :
7. Tatem sarasadem : Telok

**Temetetsü O:**

1. Meeting temer lokti chiyongba mapang alitsü.
2. Küm tatem lokti senden sendong malemer, saka Tir Yimyim aser Nagaland Post nung adoktsütsü. Anungji ajaki mejashi-i mapang shitak nung meeting-i arudaktsünur.
3. Government tetuyuba nung ajemdaker SOP shitak amshia senden alitsü.
4. Iba sendong asoshi ajaki sarasadema atadi.

OFFICE OF THE  
HEALTH CENTER MANAGEMENT COMMITTEE  
MERANGKONG VILLAGE  
**PELABA LEMSATEPER**

Merangkong Senso Kohima Officers-i Merangkong PHC nung kanga dang nungdaka aliba osettem, Generator 5KV ka aser ano machine ayika parnoki tenlaba asoshi Health Center Management Committee & PHC Staff ajanga kanga dang pelaba lemsateper.

Yimdaklir nüpur asoshi kanga aria bilema mapa tajung inyakogo, Tsüngremi nenok mapa tajung asoshi maneni moajangma.

Sd/-  
**Dr. Supongbenla**  
Medical Officer  
PHC Merangkong

Sd/-  
**Tinumangyang**  
Chairman  
HCMC Merangkong



Russian presidential envoy to Afghanistan Zamir Kabulov (abelen) aser Afghan Taliban movement nungi teshimtet nübu, Mawlawi Shahabuddin Dilawar (achichi) na Moscow, Russia nung senden amentsü lia ajurutebpa mapang tangokba noksa nung angur.

### Ethiopia-i Tigray region yimtiba nung tayimtsü amshia amaker

**Addis Ababa, Mongputeni/ Oct. 20 (Agencies):** Ethiopian federal government indang sepaitemi Tigray region indang yimtiba, Mekelle nung tayimtsü amshia amak tenzüko, koba tan hopta tanaben buba alitsü. Bodhbarnü amakba lendong nungya nisung asü-amaba osang tejanga memetet. Linük north tsütsü tayimtsü amshia amakba ya ajanga Ethiopia nung sorkar meyong sepaitem aser par tembartemi Tigrayan People's Liberation Front (TPLF) anema küm junga raraba tali tesashiba akumer. Tigrayan People's Liberation Front (TPLF) ya mapang ka Tigray amokbanga yimsü asüba party ka liasü. Sorkar indang odongtar katia iba osang ya jangjatsüogo aser

TPLF temi facility kar nok-onü yangluba aser yanglushiba tesem kumdaktsüba nung tenük yoker amak, ta ashi. TPLF kübok aliba Tigray Television nunga yimti tiyong nung tenük yoker amak, ta ashi. Parnok noksa ka sayuba nung mokozü temelem anüngleni tua aliba nguogo. Mekelle nung humanitarian sources kati osangbener dang ashiba agi, 05 Kebelle nung tayimtsü amshia amak, koba yimti tezülen cement factory ka anasa lir. Tayimtsü amshia amakba mapang industrial site ka raksatsü, ta yangji alir kati AFP news agency dang ashi. "Tayimtsü ya ali anasai alua liasü. Onoki nisung asü-amaba mejangja saka company ajunga mitsü kuma rongdokogo," ta iba

anasa alir kati ashi. Ethiopia air force ajanga Mekelle nung tayimtsü amshia amakba nung tanur asem takum samatsür anogo ana lir ibai ataloker. Air force temi communication tower aser osettsüset raksatsü, ta ashi. Tiagrayan sepaitemi June ita iba region timba tanaben agiba sülen Mekelle nung rara meliasü. Iba sülen Ethiopian region ana - Amhara aser Afar - nung raraba tali akum, kong TPLG temi agia aliba tesemtem federal sorkar indang mitkartemi tanaben agitsü meranger. Iba rara nung nisung meyrirjang aika tepsetogo aser nisung million ana dak tema pei ki yutsür tesem balala nung jenoka lir.

### Damascus bomb lendong nung Syrians sepai 14 asü

**Damascus, Mongputeni/ Oct. 20 (Agencies):** Syria yimtiba, Damascus nung sepaitem mener alidak bomb pokloktsüba lendong nung mitkar tajemba agi 14 asü aser asem yiru, ta state TV aser mitkar osang ka ajanga ashi. Bodhbarnep lendong ya Damascus nung küm aika tsüngta atalokba rongnung tesashitiba liasü aser Syria opposition fighter temi taoba mapang amokbanga aliba sorkar meyong sepaitemi atsüngdokba sülen atalokba mezüngbuba alitsü. Syrian state TV nunga central Damascus nung bus ka mi agi rongdoker aliba sayuogo aser iba lendong ya anepdang nüburtem mapa aser school-i aoba mapang atalok, ta ashi. Bus ya Hafez al-Assad apu anasa lia bomb ana apok aser

tasembuba ya army engineer temi raksatsü, koba kiralongrar map aka lir, ta ketdangsurtemi ashi. Bomb ya bus nungya inokja liasü, ta mitkar osang ka ajanga ashi. Ajisüaka tang tashi iba lendong atema kibur akumba mali. "Ibai tasü mait map aka lir. Police temi iba tesem ya meketbanga lir aser iba ama lendong tanaben mataloktsüsa mita bushir," ta Damascus police commander Major General Hussein Jumaa-i state TV dang ashi. Pai nüburtem dang temolung melemtetsüsa osettem kar danga ngura ketdangsur nemo sang agüjang, ta ashi. Syria yimtiba tiyongtsü nung atalokba lendong ya security tsütsü tashi maitba ajanga atalok ta sayur, ta osangbener kati ashi. Iba lendong ya ajanga Syria nung tensa ano majung aliba

temai adoka sayur, ta European University Institute nung affiliate professor Joseph Daher-i ashi. 2017 küm March ita Justice Palace nung bomb ka poklokja nisung 30 shi tepsetba sülen Bodhbarnü lendong ya tulutiba alitsü. 2017 nung atalokba lendong ya ISIL temi tenüng agia liasü. Bodhbarnü iba lendong atalokli army temi opposition kübok aliba north-west tsütsü injang tulu khalokja nisung 10 repseta liasü. Iba region nungya Tir Bashar al-Assad atsüngdoktsü merangba telok balala amenoka lir. 2011 küm March ita nungi tenzüka rarayonga aruba mapang nisung 350,000 dak tema takum sama aser nisung million pungo shi bendang lima nung refugee kumer lir.



Tayimtsü ka Houston Executive Airport nungi ayamesodang mi adoka Brookshire, Texas kübok Morton Road north tsütsü rongdoker aliba noksa nung angur.



27/02/1940-12/10/2021

"Kechiaser ni asoshi taküm alibaji Khrista, aser tasütsüji tajanzük lir"

### Mulungnen

Onok temeim asür Smt. Longrila Longkumtsür 12-1-2021anogo alima nungi pila-a ogo. Ozü asüko mapang shirnokisa onok den mangyim jashi lemsatepogo nenok ajak dang kanga pelar.

Nenok temeim teyaritep, aria bilemba aser metitemi sarasademtsüba ajanga onok tejashi tepungpaba kümdakja liasü. Nenok kija shia dangi arua pelaba melemsatepteter. Anungji iba mulungnen-o ajanga onok temulung taroktiba nungi pelaba metetdaksür.

~ Temeim Chirurtem, Semchir aser Kinungertem.

### Mulungnen-O




Late L. Rongsen Tasüba : 04.10.2021

Onoki teti meima aliba arishir Tsürabur Lt. L. Rongsen, Chuchuyimlang (Rtd. Teacher) tatsüka temang mejungi alidang aser Pa asüba asüko mapang Kija, Arogotem, Yimten aser lokti balala kwikati sarasadem, rongsen aser nubu agi yariogo, tongtipangsa Gilead Nursing Home, Khermahal, Dimapur, Doctor, Nurses aser Staff-tem amang sangwa metetemi yariogo ajak dang kangasa pelar. Taochi meyipa agütsüsang Tsüngremi nenok kija aser kibongtem alia moajangma ta sarasademer.

Temeim Kinungtsü, Chirur, Anük-abang, Semchirtem.

### Mulungnen

Nai rara tajungji raraogo, nai yipru tesashi ajangtetogo, aser nai tesunep ngutetogo. Tajung ajak künü anogo tatem kati arur aser nai nü mapang atong. Saka Oba, nü mapa tajungtem onok molungjang nung teti alitsü.



Onoki teti meima aliba Asür K. Chuba Jamir mapang talangka shiranga aruba mapang aser Oktober 11, 2021 nü iba lima toktsür aodang kija aser lokti tentet kwikati ozü den yaritepogo, nenok ajak dang ozü temolung taroktiba nungi pelaba lemsateper. Nenok kija shia dang ozü pelaba meshitetba atema sasa bilemer, saka Tsüngremi nenok ajak moajang ta sarasademtsür.

Onoki ano alakteta item dang pelaba lemsateper :

1. Dr. Eli Seb, Olive Hospital Dimapur
2. Nurse Arato Rengma, Olive Hospital Dimapur
3. Diphupar Village Council
4. Ao Baptist Church Diphupar
5. Ao Senso Telongjem Diphupar
6. Diphupar Langpangkong Senso Telongjem
7. Longjang Senso Telongjem Dimapur
8. Dimapur Area Chuchuyimlang Senso Telongjem

Temeim Kinungtsü, Chirur, Semchir, Anük-apang aser Kinungertem.

# Kohima nung lawyer atema seminar tenzüksüogo



**Kohima, Mongputeni/ October 20, 2021 (TYO):** Bodhbarnü, High Court Legal Services Committee den High Court Bar Association, Kohima Bench longjemer High Court - Kohima Bench nung seminar sentong ka tenzüksüogo, ta sangdong ajanga metetdaksü.

Lawyer atema Legal Profession nung ayongba seminar ya anogo 3 (October 20 nungi 22, 2021) tashi agitsü. Iba sentong nung, Gauhati High Court, Kohima Bench Judge Justice Songkhupchung Serto-i jembia liasü aser seminar nung shilem agir lawyer tem dang pei sempet tajungtiba amshitsü aser meranga inyaksü asoshi ayongzük.

Tesüiba küm ishika tejakdang Senior lawyer tawabanga kübok inyaka arudang ajangshibatem indang nung jembiba mapang, Serto-i, iba maparen (lawyer takotet ka akümsü) takok angutsü asoshi timtem/anibelem ajak arema inyakba aser iba maparen atema taa terara dang anguba indang lemsatep. Ajisüaka,

timtem angateta aser itemji aremzüka inyakba agiang lawyer tajung/takotet adoker, ta pai ashi.

Serto-isa, tribal kin dang taa meshitsü ya tayongzükba ka lir aser iba ya junga asadangshitsüla, kechiyong item lokti yagi court mesüra temzüng indang inyakyimtem mejangjai lir, ta ashi.

Gauhati High Court indang additional judge tasen, Kakheto Sema-i, ochi obendang agütsütsü atema iba Court maneni nungitta yaritsü asoshi bar nung inyakterem ayongzük aser temzüng shitak amshiba inyakyim ajungkettsütsü asoshi ajungshia liasü; ajiasünungang ochiobendang inyakyim ajungkettsü, ta pai ashi.

Kakheto-isa, pei nükjidong tongtettsü aser pei wadang nung takotet ka ka akümsü asoshi, nendaka, ochishia aser meranga inyaksüla ta seminar nung shilem agir lawyer tasentem ajangshia liasü.

Bodhbarnü, iba seminar nung session ana lemsar agiba mapang, shisalen sayurji Senior

Advocate, Odisha & Kolkata High Court, Laximidhar Pangari aser CT Jamir, Senior Advocate, Guahati High Court, Kohima Bench na liasü.

Pangari-i, Constitution of India indang Arlla 226 aser 227 indang tebandang aser 'service jurisprudence' indang nung ajemdaker jembia; aser CT Jamir, Senior Advocate, Guahati High Court, Kohima Bench ajanga 'professional ethics' indang jembigo.

Arlla 226 ajanga, ken o kar nung sorkar densema nisung mesüra authority mashika nem tetuyuba mesüra writs' agütsütsü asoshi High Courts nem tashi agütsür. Ano külen, Arlla 227 ajanga territory ajunga nung court aser tribunal ajak (armed force dak sendakba temzüng/ozüng kübok tentetba court dak alaka) madak achaayangtsü asoshi High Court shia nem tashi agütsür.

Iba session anaprongla nung, High Court Bar Association, Kohima Bench, President A Zho menden liasü.

# PELABA LEMSATEPER

ASÜR IMTIYANGLA JAMIR (MOPUNGCHUKET)

27/07/1938 - 13/10/2021



Onoki teti meima aliba ojala **Imtiyangla Jamir**, la akümüli alishi nung tashimeiti kümer alitang tanüla nung renemshitsü atema shisatsü aser sarasadem nung yarirtem aser la akümüli wadang tempangba anogo nung temeimertem-kija kibong, kiyonger, Arogo, yimten, lokti tentet balala aser bendang balala nungi shirnokisa nübo, rongsen aser sarasadem agi onok dang temeim mapa tajung inyakoko nenok ajak dang onok temolung taroktiba nungi kangasa pelaba lemsateper.

Tulusang Tsüngremi nenok temeim mapa tajung talubosa moajangma ta ozü sarasadem.

**Temeim chirnurtem, semchirtem, anükapangtem aser kinungertem.**

# Mokokchung nung Nagaland Guitar Festival 2021 akatsü



**Mokokchung, Mongputeni/ October 20, 2021 (TYO):** Task Force for Music and Arts (TaFMA) aser Mokokchung Events Management (MEM) na külemi lungjemer "Nagaland Guitar Festival 2021" ta sür guitar benjong tulu ka 22nd October, 2021 nü yangi Just A Venue Mokokchung nung ayongzükba lir. Iba atema tayongertem tesümgangtsüka petepa renemshidaki.

Iba benjong nung live competition six string guitar contest ka alitsü aser iba nung takok angur nem senpet sen 40,000/- aser 20,000/- agütsütsü aser iba senpetji Naga Musicians Collective (NMC)-i sponsor asür, ta sentong ayongertemi osangbener senden ka yangi Sangtemla Community Hall Mokokchung nung akadang metetdaksü.

Iba benjong nung jangratemtsükaji; Nagaland

nung nungtugu guitar atemer, music school nung azünger aser tesayurtemi sentong nungji shilem agitsü. Iba den tesem balala nungi guitar dak sentakba osettsüset bener arua sayuba aser ayokba den nungtugu guitarist-temi shisatokden agütsütsü aser parnok den sensaksemba mapang lapoktsütsü sentong renema lir. Shisalen sayurtemji; Atsa Lang Roths, Mhaseve Tetseo aser Arenlong nungertem asütsü.

Guitar tetoktepa nungji Nagaland tesem balala nungi nisung aika arua shilem agitsü imalr. Iba benjong ya anepdang 10:00 ako nungi tenzükba akatsü. Sentong nung Mokokchung Commissioner, Limawabang Jamir tetushi tesemdanger asütsü jaoka lir. Sentong nung TaFMA Project Director, Dr. Hovithal Sothu-ia shilem agitsü.

Iba benjong amungdang sorkari latettsüba SOP shitak

benshitsu. Iba amala sentong ya Nagaland nung mezüngbuba asütsü aser ibai angati dang sayutsü, iba ama aiben asenok dangi maongka marutsü, anungji, ajak arua adentsü ayongzükba, ta tayongertemisa metetdaksü.

Nisung kari danga iba benjong dak sentakba nung osang tejangja metetnüra, item mobile number - (9089740266/9862118137/8258858981) ajanga tayonger MEM tongtettsü.

Mokokchung Events Management (MEM) ya 2016 küm Squadron Band nung vocalist Longriwati Imchen-i tentetba lir. 2016 küm nungi MEM ajanga sentong (event) tapu balala ayonga arudar.

# Pelaba Lemsateper



Onoki teti meima aliba asür **N. Alila Aier** (Longpa) W/o. asür K.Jongpong Longchar (Nokpu), la mapang talangka shiranga alidang aser October 16, 2021 nung iba akümüli nungi pila orr onok mangyim jashi nung alidang, temolung kwinakati ozü dang aria bilema yariogo nenok ajak dang ozü pelaba lemsateper.

Nenoki temeim sayua nübu, rongsen aser sarasadem agi nungitta yariba ajanga onok molung süneptsüogo. Nenok kija shia tenüng teta ozü pelar ta meshitetba atema sasar, ajisüaka Tulusang Tsüngremi nenok ajak molamushia moajangma ta ozü sarasademtsür.

**Temeim, Adianutem, Kinungertem aser Anük-Apangtem.**

## Dimapur Watsü Telongjem-i metetdaksür

Item tekübok agüja aliba Amitsürtem ya kanga tongtipang nungdak kar alinung Dimapur Watsü Telongjem Treasurer kidangi 23rd Oct. 2021 Mapang 9:00 AM shidak nung ken arutsü mepishir.

**List of Beneficiary of Destitute Women :**

S/N	Name of Beneficiary	F/Name	Colony
1.	Mapuenla	Lt.Sünep	Ao Kasharam
2.	Imkongjungla	Lt.Nungtoktoshi	Nahabari
3.	Inyaktola	Chubanokden	Diphubar
4.	Wapangla Aier	Lt.Bendang	Nahabari
5.	Tsuktilemla	Imkongsowa	Nahabari
6.	Tamongla	Wapang	Oriental
7.	T.Amongla	Imkongliba	Sugar Mill
8.	Atule Longchar	Yarba	Sugar Mill
9.	Amongla	Wati (husband)	Dimapur
10.	Narola		Purana bazaar B
11.	Helen Ao	Temjenkaba	Aoyimti
12.	Temjennungla Ao	Rolland Ao	Padumphueri
13.	Tiala Jamir	Imjung Jamir	Diphubar Irrigation Colony
14.	Arutle Jamir	Lanu Jamir Husband	Burma camp.

**Sd/-**  
**(Wt. Yarsangla)**  
**President, DWT (Ph no: 9436267539)**

**Sd/-**  
**(Wt. Aoinla.Jamr)**  
**Secretary, DWT (Ph no :9856171163)**

NSF Trophy: Bandits FC, Asufü CI aser Head Hunters nungeri takok angur



Kohima, Mongputeni/October 20, 2021: NSF Martyrs Memorial Trophy asayamung nung Head Hunters aser United Falcon na tsungda asayaba mapang tangokba noksa ka yangi angur.

**Kohima, Mongputeni/October 20, 2021 (TYO):**

Indira Gandhi Stadium kübok tang asaya aliba NSF Martyrs Memorial Trophy asayamung nung, Bandits Football Club Kohima, Asufü Christian Institute Manipur aser Head Hunters Jakhama nungeri pei pei tata asaya takok ngua pre-quarter final-i iogo.

Bodhbarnü, mezüing match nung, Bandits FC Kohima-i Billy Graham FC goal 2-1 agi tsükdaktsü. Iba asaya tenzükli second 35 nung Billy Graham nungi forward Luke Seb-i goal 1 inoktsü. Iba asayamung nung asaya tenzükli goal takaratiba

inoktsür asayar rongnung Luke asütsü.

Ajisüaka, Bandits atema Thejaselie Therüja aser Khiti Kath anti goal ka ka inoktsüba ajanga par telok taruba round nung asayatsü jenjang ka ajangzüktet.

Tanabuba match nung, Asufü CI Manipur-i goal 2-1 Young United 18 Boys FC tsükdaktsü. Young United 18 Boys atema Kikrubeizo Keditsu-i mezüing goal inoktsü, saka Asufü CI atema Adarhii Likhi aser A. Kajiikho nati goal ka ka idakja, Asufü-i iba asaya koktet.

Kasa asayamung, tasembuba match nung, Head

Hunters-i goal 4-1 agi United Falcon tsükdaktsü. United Falcon atema Komezo Kuotsu-i goal ka inoktsü. Kasa asaya nung Head Hunters atema Chingsha Jina-i goal 1, Samsom-i goal 2 aser Chingkamlung-i goal pezübuba bendenlokja liasü.

Iba asayamung achaayanger - Angami Students Union-i, Brehostibarnü (21.10. 2021) football match ka danga masayatsü, ta metetdaktsü.

**\* Hokolbarnü (22.10.2021) atema asaya yamai alitsü :**

1. Mele FC vs Khuzama United FC @ 12:30 PM
2. Kitsuobozou Youth Society vs Gaziphema FC @ 2:00 PM

5buba PTSA Inter-ward Tournament tenzükogo



Pftusero, Mongputeni/October 20, 2021: Pftusero Town kübok 5buba Inter-ward Tournament lapokba sentong nung, Minister Kronu den PTSA ketdangsür aser tanga tongtibang nübutem külemi tangokba noksa ka yangi angur.

**Pftusero, Mongputeni/October 20, 2021 (TYO):**

Bodhbarnü, Nagaland Minister for Planning & Coordination, Land Revenue & Parliamentary Affairs Neiba Kronu-i Phek district kübok Pftusero Sports complex nung 5buba Inter-ward Tournament tenzüksüogo. Anogo asem tashi asayatsü aliba asayamung ya "Positivity always wins" omen nung ajemdaker ayongzüker, ta sangdong ajanga metetdaktsü.

Pftusero Town kübok ward 11 nungi team temi tebur football "Lt. Neikhrope Ritse Trophy" aser tetsür volleyball asaya nung shilem agitsü.

Minister Kronu-i, taoba küm Covid-19 tensa süngjema maoba ajanga iba asayamung tulu ayongzüksü timtem ajurua liasü. Iba tesashi wara ajanga senti taküm aika samaogo aser nübur den State rangben nung rongsenketzüing tsütsü takok

jenti adokdaktsüogo, ta ashi.

Ajisüaka, rongsenketzüing ajungkettsü asoshi asenok ajak asentenshir inyak tenzüksüla ta telok ayongzüka mapang, Minister-i, rongsenketzüing tanaben ajungkettsütsü asoshi PDA sorkari asalentong balala inyakdar, ta ashi.

Chief Minister Rio, shiba Nagaland Olympic Association indang president lir, State nung saisapong aser saisaponger tem ajungkettsütsü asoshi pai meranga inyakdar, ta Kronu-i ashi.

Naga nunger dak saispong sempet tajung lir aser asayamung (local event) nung parnoki item sempet sayur, saka temaba jenjang aser tetoktepba nung asayatsü nükla kecha mekai pei ajangzüktetba nung tali temolung ulur aser aji tatembang ama bilemer, ta pai tuteta ashi.

Anungji, saisponger ya ajaki

akümstübuba nübu ka ta metettsüla aser saisponger ka ama chiyongtsü shitak chia-ajemtsü aser temesepba chiyongtsü nungi pilar alitsüsa pei sasa pei taküm aziüoktsüla, ta pai ajungshia liasü.

Minister-isa, Pftusero atema Astroturf football ground tasen ka yanglutsü atema asalentong yangludat, ta sangoktsü.

State nung tanga district headquarter dang nungi tajungba achaayanga litetba atema, ADC Pftusero Japheth Woch-i Pftusero Town nung alir nüburtem dang pelaba metetdaktsü.

Maneni, iba asayamung ya October 23, 2021 nü tembangtsü, Chairman Entrepreneurs Development Agency, Kohima Kudecho Khamo tongti tesemdanger ama aruagi iba asayamung shibangba sentong nung adentsü, ta kasa sangdong nung shia lir.

T20 World Cup nung spin bowler temi shilem tulu agitsü: Rashid Khan

Mongputeni/October 20, 2021 (Agencies): Afghanistan indang cricket star aser leg-break bowler, Rashid Khan-i ashiba agi, tang asaya aliba ICC T20 World Cup asayamung nung 'spin bowler' temi tongti shilem agitsü aser iba asayamung nung team-i (Afghanistan) batting tsütsü junga dang asayara team mashi madak takok angutsü akok.

T20 World Cup nung tanabenbuba shilem agisang, Rashid-i, UAE, kong Super 12s, semi-finals aser final asayatsü, iba tesem kübok cricket asaya stadium asempronlga nung pitch' ya spin bowler atema kanga tajung asütsü ta bilemer, ta ashi.

"Item asaya tesem asem nung pitch ya spinner atema kanga dang tetemjen aser iba asayamung ya spinners' World Cup asütsüla," ta Rashid-i ashi.

"Idaki pitch tem komaka renem yongjia, spinner atema kanga tajangzüc asür. Tan World Cup nung spinner temi shilem tuluka agitsü. Asenoki IPL nung anguba ama, spinner temi pei pei team nung shilem agiba angutsü. World Cup nunga parnoki (spinner) kasa sempet amshia asayatsü ta bilemer. Spinner tajungtibai pei pei team nungitta asayatsü," ta pai ashi.

Afghanistan team, shirnok India, Pakistan aser New Zealand den Group 2 nung ataja lir, Super 12s nung tanga team

tem jenjang junga asadangshia iba team yagi kanga meranga asayatsü nungdaker, ta Rashid-i, bilemba ka lemsatep.

UAE kübok venue asempronlga nung Afghanistan-i T20Is 14 asayaogo aser team-i asaya ajak takok ngua lir. Team-i batting tsütsü kanga temulung agüja asayatsüla, ta Rashid-i tuteta ashi.

"Kidang kü adianutem (brothers) timbaka cricket asaya. Onok tsungda kanga toktepa asaya aser parnok out sütsütsü, parnok dang nungi run timba yanglutsü aser asaya takok angutsü asoshi tayongzüka tulu liasü. Item asaya nungi ni cricket asayar tajung ka aküm," ta Rashid-i ashi.

"Kima yimdong nung kazüa senzütsü aser medemertem den cricket asayatsü asoshi tsüraburi memela. Tsüraburi kü dang, yimdong nung meimlaba lendong ataloktsü akok, na study/lesson nungang temulung agüjang aser cricket asayanüra kidang adianutem den asayang ta ashi," ta Rashid-i lemsatep.

Rashid, shibai World Cup metenzükang captain mapa toktsü, pai ashiba agi, lanuwa mapang ni doctor ka akümstü nükjidong liasü.

"Ni cricket asayar ka akümstü ta kodanga bilema meliasü. Hau, kidang ni cricket junga asaya liasü, saka kenü anogo Afghanistan atema cricket asayatsü ta meblem," ta pai ashi.



Kochi, Mongputeni/October 20, 2021: Bodhbarnü, Maharaja Stadium, Kochi nung Indian Air Force football team-i 72buba Inter-Service Football Championship takok anguba sülen asayarterm külemi tangokba noksa ka yangi angur.



Kohima, Mongputeni/October 20, 2021: Athletics Federation of India, General Secretary, Ravinder Chaudhry aser AFI Asso. Vice President, Abu Metha den Athletics indang Technical Ketdangsürtem külemi tangokba noksa ka yangi angur. Nagaland nung South Asian Cross Country Championships agitsü lia, Bodhbarnü, AFI General Secretary-i Nagaland semdang aser aruya aliba asayamung atema senden agia liasü.

**BILEMDANGANG**

"Kanga shiametet saka tangari inyakba ama meinyaktet."